

MOTOR GESPESIFISEERDE VOERTUIE

AFDELING

Hierdie bewoording moet saamgelees word met die Motor Algemene bewoording. Die omskrywings, verpligte voorwaardes, spesifieke uitsluitings en klousules van die Motor Algemene bewoording is ook van toepassing op hierdie afdeling, tensy spesifiek anders aangedui.

OMSKRYWINGS

Kaping: sal beteken die onwettige, opsetlike verwydering van die Versekerde Voertuig sonder die Versekerde se toestemming met die gebruik of dreigement van die gebruik van 'n vuurwapen of enige ander gevaarlike wapen, die toediening van ernstige liggaamlike leed of 'n bedreiging van liggaamlike besering deur die oortreder of enige medepligtige .

Versekerde Voertuig: sal beteken enige Voertuig

1. die eiendom van die Versekerde, of
2. wat deur die Versekerde gehuur of gebruikhuur word, of
3. wat deur die Versekerde gebruik word as 'n plaasvervanger vir enige Voertuig in 1 of 2 hierbo wat in onbruik is vir die doeleindes van versiening, instandhouding en/of herstelwerk met dien verstande dat die Maatskappy se maksimum aanspreeklikheid hoogstens die Kleinhandelwaarde van die vervangingsvoertuig of die versekerde bedrag van die Voertuig soos in die bylae vermeld, wat ook al die laagste is, beloop.

Taxi: sal beteken enige tipe Voertuig wat te huur is met 'n bestuurder en wat gebruik word deur 'n enkele of klein groep passassiers om hulle te vervoer tussen bestemmings van hulle keuse.

Diefstal: sal beteken die onwettige, opsetlike verwydering van die Versekerde Voertuig as 'n geheel sonder die Versekerde se toestemming.

Afskrywing: sal beteken dat skade aan 'n Voertuig, in die opinie van die Maatskappy nie ekonomies herstelbaar is nie.

Kleinhandelwaarde

1. Vir Voertuie gelys in die motorhandelaarsgidse, sal Kleinhandelwaarde beteken die gepubliseerde Kleinhandelwaarde aangepas volgens die aanbevelings van die gids vir afstandmeterlesing, algemene toestand, ekstra's, toebehore en onderdele wat aan die Voertuig geheg is ten tye van die verlies of skade.
2. Vir Voertuie, Voertuigtipes en toebehore wat nie in die motorhandelaarsgidse gelys is nie sal Kleinhandelwaarde gebaseer wees op 'n minimum van drie kwotasies wat verkry is van die kleinhandelmark vir 'n soortgelyke Voertuig van dieselfde fabrikaat en model in 'n soortgelyke toestand ten tye van die verlies of skade.

ONDERAFDELING 1 – SKADE AAN DIE VERSEKERDE VOERTUIG

OMSKREWE GEBEURTENISSE

Verlies van of skade aan enige Versekerde Voertuig soos in die bylae beskryf.

Met dien verstande dat:

- (a) die Voertuig se versekerde bedrag word in die bylae vermeld en die maksimum bedrag wat deur die

Maatskappy betaalbaar is, is die minste van die versekerde bedrag of die Kleinhandelwaarde van die Voertuig ten tye van die verlies of skade;

- (b) ingeval enige onderdeel van enige Voertuig onverkrygbaar is as 'n standaard (pasklaar vervaardigde) artikel in die Republiek van Suid-Afrika, die Maatskappy se aanspreeklikheid geag nagekom te wees deur 'n bedrag te betaal gelykstaande aan die waarde van die onderdeel (met inbegrip van die redelike koste van vervoer) ten tye van die ongeluk, maar in iedere geval tot hoogstens die deel se prys soos aangegee in die vervaardiger se jongste uitgerekte katalogus of pryslys;
- (c) die Maatskappy na sy eie keuse die Voertuig of enige deel daarvan en/of die toebehore en onderdele daarvan mag herstel of vervang of die bedrag van die verlies of skade in kontant betaal tot hoogstens die Kleinhandelwaarde van die Voertuig en/of die toebehore en/of onderdele ten tyde van die verlies of skade, onderhewig aan die Maatskappy se maksimum aanspreeklikheid uiteengesit in voorbehoudsbepaling (a);
- (d) indien die Voertuig na die wete van die Maatskappy die onderwerp van 'n opskortende verkoops- of soortgelyke ooreenkoms is en die Versekerde Voertuig afgeskryf of gesteel / gekaap word en nie teruggevind word nie, sal die betaling gedoen word aan die eienaar wat daarin beskryf word wie se kwitansie dien as volle en finale ontslag van die Maatskappy ten opsigte van die verlies of skade;
- (e) ingeval van skade wat beperk is tot die voorruit-, sy- of agterruitglas alleenlik wat deel uitmaak van enige Versekerde Voertuig, die Versekerde verantwoordelik is vir die eerste bedrag betaalbaar van toepassing op motorglas wat in die bylae vermeld word vir iedere en elke Voorval;
- (f) diefstal van onderdele of bykomstighede van die Versekerde Voertuig waar die Voertuig self nie terselfdertyd gesteel is nie, word geag skade aan die Voertuig te wees vir die doeleindes van die toepassing van die eerste bedrag betaalbaar.

TOEBEHORE

Toebehore en onderdele soos vooraf omskryf in die Voertuigomskrywing in die Motor Algemene bewoording en volgens die opsie van die Versekerde mag beskryf word in die bylae.

Met dien verstande dat:

1. waar die toebehore en onderdele permanent deel van die Voertuig is, volgens die keuse van die Versekerde, mag hierdie items in die bylae gelys word as Toebehore ingesluit in die versekerde bedrag van die Voertuig en dat hulle waarde geag word ingesluit te wees in die versekerde bedrag van die Voertuig en dat die versekerde bedrag voldoende is;
2. waar toebehore en onderdele nie permanent deel uitmaak van die Voertuig nie, soos in die geval van 'n kappie of sleepstang, volgens die keuse van die Versekerde, mag dit gelys word in die bylae as Toebehore nie ingesluit in die versekerde bedrag van die Voertuig nie en hulle waarde word apart vermeld en bykomend tot die versekerde bedrag van die Voertuig.

Toebehore nie ingesluit in die Voertuig se versekerde bedrag

Nieteenstaande enige iets teenstrydig vervat in voorbehoudsbepaling (a) van Omskrewe Gebeurtenisse van onderafdeling 1 en die omskrywing van "Voertuig" en onderhewig aan die bepalings, voorwaardes en uitsluitings van hierdie afdeling, sal die Maatskappy die Versekerde skadeloos stel vir verlies van of skade aan die toebehoorsel gelys in die bylae soos volg:

1. Waar die toebehoorsel gesteel of beskadig word terwyl dit losstaande is van die Versekerde Voertuig of gesteel of beskadig word sonder dat die Versekerde Voertuig in dieselfde Voorval gesteel of beskadig word, sal die Maatskappy se aanspreeklikheid nie die versekerde bedrag van die toebehoorsel of die vervangingswaarde van 'n soortgelyke toebehoorsel in 'n nuwe toestand oorskry nie (wat ook al die minste is) ten tye van die verlies of skade.

Met dien verstande dat:

- (a) indien die vervangingswaarde van die toebehoorsel ten tye van die verlies of skade meer is as die versekerde bedrag daarvan, die Versekerde beskou sal word as sy eie versekeraar vir die verskil en daarom 'n eweredige deel van die bedrag van die verlies of skade sal dra. Elke toebehoorsel in die bylae gelys sal afsonderlik onderhewig wees aan hierdie voorwaarde;
- (b) waar die toebehoorsel bestaan uit artikels van 'n paar of stel, sal die Maatskappy slegs vir die waarde van die hele paar of stel aanspreeklik wees indien die vervanging van die individuele item in die paar of stel nie moontlik is nie;

- (c) waar die toebehoorsel voertuigbande insluit, sal die Maatskappy enige skikking aan die Versekerde in verband met voertuigbande verminder in verhouding tot die loopvlak gebruik;
 - (d) die bepalings van hierdie onderafdeling wat verband hou met eisvrye groepe nie van toepassing is op enige betaling wat vir toebehore gemaak word nie;
 - (e) die Versekerde verantwoordelik sal wees vir die eerste bedrag betaalbaar in die bylae vermeld vir die toebehoorsel met betrekking tot iedere en elke Voorval.
2. Waar die toebehoorsel aan die Voertuig geheg is en die Versekerde Voertuig gesteel of beskadig word in dieselfde Voorval, sal die versekerde bedrae van alle toebehore gelys in die bylae, by die versekerde bedrag van die Voertuig getel word.

Met dien verstande dat:

- (a) die Maatskappy se aanspreeklikheid nie die bedrag soos uiteengesit in voorbehoudsbepaling (a) van die Omskrewe Gebeurtenisse van onderafdeling 1 van die Voertuig plus die versekerde bedrag van die toebehoorsel of die vervangingswaarde van 'n soortgelyke toebehoorsel in 'n nuwe toestand (wat ook al die minste is) sal oorskry nie ten tye van die verlies of skade;
- (b) die eerste bedra(e) betaalbaar ten opsigte van die toebehoorsel/toebehore in die bylae vermeld sal nie geld nie. In plaas daarvan sal die eerste bedrag betaalbaar van toepassing op die Voertuig toegepas word op die versekerde bedrag soos in 2 hierbo bepaal.

UITSLUITINGS OP ONDERAFDELING 1

Die Maatskappy is nie aanspreeklik om vir die volgende te betaal nie:

1. gevolglike verlies weens enige oorsaak hoegenaamd;
2. waardevermindering hetsy dit ontstaan weens herstelwerk ná 'n Omskrewe Voorval of andersins;
3. slytasie;
4. geleidelike agteruitgang;
5. meganiese, elektroniese of elektriese onklaarraking, weiering of brekasie;
6. gevolglike skade aan enige ander meganiese, elektriese of elektroniese komponent as 'n gevolg van die genoemde onklaarraking, weiering of brekasie;
7. skade aan buitebande deur die gebruik van remme of deur padlekkasies, snye of barste;
8. skade aan veerstelsels/skokbrekers te wyte aan ongelykhede van die pad of ander oppervlak of weens botsing met sodanige ongelykhede;
9. terughouding, konfiskering of rekwisisie deur enige doeane- of ander beamptes of owerhede met dien verstande dat hierdie uitsluiting nie sal geld nie ten opsigte van skade wat plaasvind gedurende die terughouding, konfiskering of rekwisisie en wat ontdek word wanneer die Voertuig aan die Versekerde terugbesorg word.

UITBREIDINGS OP ONDERAFDELING 1

Andersins onderhewig aan die terme, uitsluitings en voorwaardes van hierdie onderafdeling en die Algemene afdeling (waarvan alles geldig en toepaslik bly, tensy spesifiek hieronder geskrap of verander), word die dekking ingevolge hierdie afdeling verander of uitgebrei soos hieronder uiteengesit onder elke uitbreiding en klousule (maar waar van toepassing soos hieronder aangedui, slegs indien die uitbreidings en klousules as ingesluit in die bylae vermeld word).

Krediettekort (indien in die bylae as ingesluit vermeld)

Waar die skikkingsgrondslag Kleinhandelwaarde is en enige skikking vir totale verlies ingevolge onderafdeling 1 minder is as die bedrag verskuldig aan die finansierder onder 'n huidige afbetalings- of bruikhuurooreenkoms, sal die Maatskappy aan die Versekerde 'n verdere bedrag betaal gelykstaande aan die tekort, minus:

1. enige agterstallige paaiemente of huurgeld insluitende rente betaalbaar op die agterstallige bedrae;
2. alle premierugbetalings vir kansellasië van enige versekeringsdekking wat met die Voertuig verband hou;
3. die eerste bedrag betaalbaar ingevolge onderafdeling 1;

4. enige bedrae gefinansier wat verband hou met voertuigwaarborge, diensplanne, onderhoudsplanne en dies meer;
5. enige bedrae gefinansier vir toebehore wat nie deel van die Voertuig uitmaak nie.

Met dien verstande dat:

- (a) hierdie uitbreiding nie van toepassing is nie op 'n ooreenkoms ingevolge waarvan die bedrag van enige enkele paaient, buiten die finale reswaarde-bedrag ná die aanvanklike paaient, met meer as 10% van enige ander paaient verskil;
- (b) indien die tekort die resultaat is van 'n hervoorskot ingevolge 'n afbetalingsooreenkoms of herfinansiering ingevolge 'n bruikhuureenkoms, die versekering ingevolge hierdie uitbreiding nietig verklaar word;
- (c) hierdie uitbreiding nie van toegepassing sal wees nie waar die bedrag verskuldig aan die finansierder meer is as die Kleinhandelwaarde van die Voertuig as gevolg van herstrukturering van skuld.

Brandbluskoste (indien in die bylae as ingesluit vermeld)

Die Maatskappy sal, bykomend tot die bedrag van die Versekerde Voertuig, enige koste betaal tot en met die versekerde bedrag in die bylae vermeld wat verband hou met die blus of bestryding van brand (insluitend die vervanging of hervulling van die Versekerde se brandblussers nadat dit gebruik is in verband met die Versekerde Voertuig).

Met dien verstande dat:

- (a) die Versekerde regtens aanspreeklik is vir die koste;
- (b) die Versekerde Voertuig gebrand het of 'n brandgevaar was.

Eerste bedrag betaalbaar vermindering - skade aan die Versekerde Voertuig (indien in die bylae as ingesluit vermeld)

Onderhewig andersins aan die bepalings, voorwaardes, uitluitings en waarborge vervat in hierdie onderafdeling, sal die Maatskappy die eerste bedrag betaalbaar betaal, soos vermeld in die bylae, vir skade aan die Versekerde Voertuig.

Met dien verstande dat:

- (a) die skade aan die Voertuig gedek is in terme van onderafdeling 1;
- (b) in die geval van afgehandelde eise, die voordeel onder hierdie uitbreiding slegs betaalbaar word wanneer die eis deur die Maatskappy geskik is;
- (c) in die geval van onafgehandelde eise, waar die bedrag van die geassesseerde eis minder is as die eerste bedrag betaalbaar, sal die voordeel ingevolge hierdie uitbreiding slegs betaalbaar word by ontvangs van sodanige bewyse, inligting en beëdigde verklarings soos wat die Maatskappy mag vereis;
- (d) die Maatskappy se aanspreeklikheid ingevolge hierdie uitbreiding beperk is tot die minste van die eerste bedrag betaalbaar onder die opskrif "Skade aan die Versekerde Voertuig" of die werklike eerste bedrag betaalbaar op die spesifieke eis;
- (e) die Versekerde aanspreeklik sal wees vir die eerste bedrag betaalbaar soos in die bylae vermeld vir iedere en elke Voorval.

Eerste bedrag betaalbaar vermindering – diefstal/kaping (indien in die bylae as ingesluit vermeld)

Onderhewig andersins aan die bepalings, voorwaardes, uitluitings en waarborge vervat in hierdie onderafdeling, sal die Maatskappy die eerste bedrag betaalbaar betaal, soos vermeld in die bylae, vir Diefstal/Kaping van die Versekerde Voertuig.

Met dien verstande dat:

- (a) die verlies van die Voertuig gedek is in terme van onderafdeling 1;
- (b) in die geval van afgehandelde eise, die voordeel onder hierdie uitbreiding slegs betaalbaar word wanneer die eis deur die Maatskappy geskik is;

- (c) in die geval van onafgehandelde eise, waar die bedrag van die geassesseerde eis minder is as die eerste bedrag betaalbaar, sal die voordeel onder hierdie uitbreiding slegs betaalbaar word by ontvangs van sodanige bewyse, inligting en beëdigde verklarings soos wat die Maatskappy mag vereis;
- (d) die Maatskappy se aanspreeklikheid ingevolge hierdie uitbreiding beperk is tot die minste van die eerste bedrag betaalbaar onder die opskrif "Diefstal/kaping" of die werklike eerste bedrag betaalbaar ten opsigte van die spesifieke eis;
- (e) die Versekerde aanspreeklik sal wees vir die eerste bedrag betaalbaar soos in die bylae vermeld vir iedere en elke Voorval.

Sleutels (indien in die bylae as ingesluit vermeld)

Die Maatskappy sal die Versekerde skadeloos stel ten opsigte van die koste van die vervanging van slotte en sleutels insluitende die afstandalarmbeheerder en indien nodig, die herprogrammering van enige gekodeerde alarmstelsel van enige Versekerde Voertuig ná die verdwyning van of skade aan enige sleutel of alarmbeheerder van die Voertuig, of opvolgend tot skade aan die Voertuig se slotte ten einde kragdadige toegang tot die Voertuig te verkry, of nadat die Versekerde rede het om te glo dat enige ongemagtigde persoon in besit mag wees van 'n duplikaat van die sleutel of alarmbeheerder.

Met dien verstande dat:

- (a) geen ander skade aan die Voertuig aangerig is wat aanleiding gee tot 'n eis onder die polis nie;
- (b) die Maatskappy se aanspreeklikheid nie die versekerde bedrag sal oorskry nie wat in die bylae vermeld word onder hierdie uitbreiding vir enige enkele Voorval;
- (c) die Versekerde aanspreeklik sal wees vir die eerste bedrag betaalbaar in die bylae vermeld vir iedere en elke Voorval;
- (d) die bepalinge van hierdie onderafdeling wat verband hou met eisyrye groepe nie van toepassing sal wees nie op enige betaling gedoen ingevolge hierdie uitbreiding.

Gebruiksverlies (indien in die bylae as ingesluit vermeld)

Nieteenstaande uitsluiting 1 van onderafdeling 1, sal die Maatskappy die Versekerde skadeloos stel vir die verlies van gebruik van die Versekerde Voertuig as gevolg van verlies van of skade .

Met dien verstande dat:

- (a) die verlies van of skade aan die Versekerde Voertuig gedek is in terme van hierdie polis;
- (b) waar die Voertuig
 1. gesteel of gekaap is en nie teruggevind is nie, of
 2. nie rybaar is nie,
 die dekking 'n aanvang sal neem sodra 'n eis by die Maatskappy geregistreer is;
- (c) waar die Voertuig
 1. beskadig is, maar steeds rybaar is; of
 2. gesteel of gekaap is en in 'n beskadigde toestand teruggevind is, maar steeds rybaar is,
 die dekking 'n aanvang sal neem sodra die gemagtigde hersteller die Versekerde Voertuig in sy bewaring neem met die doel om dit te herstel;
- (d) verlies of skade wat binne die betrokke eerste bedrag betaalbaar val, nie gedek is in terme van hierdie uitbreiding nie;
- (e) vergoeding sal eindig;
 1. op die dag van afhandeling van die herstelwerk deur die gemagtigde hersteller; of
 2. op die dag waarop die ooreenkoms van verlies deur die Maatskappy aan die Versekerde gestuur word;
- (f) nieteenstaande voorbehoudsbepaling (e) hierbo, sal skadeloosstelling deur hierdie uitbreiding nie die aantal dae oorskry nie wat in die bylae vir enige enkele Voorval vermeld word;
- (g) die Maatskappy se aanspreeklikheid per dag nie die versekerde bedrag (per dag) sal oorskry nie wat in die bylae vermeld word.

Insleepkoste na meganiese onklaarraking (indien in die bylae as ingesluit vermeld)

Indien die Versekerde Voertuig of Voertuigkombinasie (insluitende sleepwaens) buite werking raak as gevolg van meganiese, elektroniese of elektriese onklaarraking, sal die Maatskappy betaal vir die redelike koste om die Voertuig of Voertuigkombinasie na 'n hersteller of na die Versekerde se perseel binne die Republiek van Suid-Afrika te sleep.

Met dien verstande dat:

- (a) die Versekerde Voertuig die eiendom van die Versekerde is of aan die Versekerde gehuur of gebruikhuur is.
- (b) die insleepkontraakteur op die Maatskappy se lys van goedgekeurde insleepkontrakteurs is.
- (c) die Maatskappy se aanspreeklikheid hoogstens 'n perk van R15 000 met betrekking tot enige enkele Voorval sal beloop.

Die Maatskappy sal nie aanspreeklik wees nie vir:

1. stoorkoste vir die Versekerde Voertuig, hetsy voor of na herstelwerk uitgevoer is.
2. koste om die Versekerde Voertuig te herstel.

Motorhuur (indien in die bylae as ingesluit vermeld)

Die Maatskappy sal die Versekerde voorsien van 'n huurvoertuig soortgelyk, maar nie minderwaardig nie, aan die Voertuig beskikbaar onder die opskrif "Groep" in die bylae vermeld, indien die Versekerde Voertuig:

1. onbruikbaar is of herstel word, of
2. 'n Afskrywing is, of
3. gesteel of gekaap is en nie teruggevind is nie.

Met dien verstande dat:

- (a) 'n eis by die Maatskappy ingedien is en dat die verlies of skade gedek is in terme van die polis;
- (b) die Versekerde Voertuig 'n Voertuig is soos omskryf in voertuigomskrywing 1.1 en 1.3;
- (c) die adres waar die huurvoertuig afgelewer moet word, binne die grense is van die RSA;
- (d) die huurvoertuig sal voorsien word totdat
 - i. die Versekerde Voertuig bevredigend herstel is waar herstelwerk ekonomies moontlik was, of
 - ii. die Versekerde Voertuig vervang is, of
 - iii. die eis in kontant geskik is in geval van 'n kontantskikking, of
 - iv. die Versekerde Voertuig teruggevind is en, indien nodig, herstel is waar die Voertuig gesteel is en teruggevind is met skade;
- (e) niesteenstaande voorbehoudsbepaling (d) hierbo, die huurvoertuig nie voorsien sal word vir 'n langer tydperk as die aantal dae in die bylae vermeld nie;
- (f) verlies of skade wat binne die toepaslike eerste bedrag betaalbaar val, nie gedek is in terme van hierdie uitbreiding nie;
- (g) die Versekerde verantwoordelik sal wees vir 'n sekuriteitsdeposito betaalbaar aan die diensverskaffer wanneer die huurvoertuig ontvang word;
- (h) die Maatskappy aanspreeklik sal wees vir die koste van aflewering en afhaal van die huurvoertuig by en vanaf die Versekerde.

Indien die Versekerde voorsien moet word van 'n huurvoertuig buite die RSA, maar binne die gebiedsgrense wat die polis dek, mag die Versekerde 'n Voertuig huur van 'n erkende verhuringsmaatskappy vir sy eie rekening. By die voorlegging van 'n faktuur sal die Maatskappy die Versekerde vergoed vir die huurkoste, met dien verstande dat die huurkoste per dag nie meer sal wees nie as die bedrag wat die Maatskappy sou betaal om sodanige Voertuig binne die RSA te voorsien deur van sy eie diensverskaffers gebruik te maak.

Vervanging van voertuie

Ingeval die Versekerde Voertuig 'n Afskrywing is of gesteel en nie binne 'n redelike tyd teruggevind word nie, sal die Maatskappy die Voertuig vervang met 'n soortgelyke nuwe Voertuig onderhewig aan die beskikbaarheid daarvan.

Met dien verstande dat:

- (a) hierdie uitbreiding slegs van toepassing is op Voertuie soos omskryf in voertuigomskrywings 1.1 en 1.3;
- (b) die verlies of skade plaasvind binne 12 maande vanaf die datum van eerste registrasie van die Voertuig;
- (c) die Versekerde Voertuig nie meer as 2,500 kilometer per maand of 30,000 kilometer in totaal afgelê het nie;
- (d) die Maatskappy nie aanspreeklik sal wees nie vir meer as die Voertuig se versekerde bedrag soos in die bylae vermeld minus die eerste bedrag betaalbaar.

Oproer en staking (behalwe RSA en Namibië) (indien in die bylae as ingesluit vermeld)

Andersins onderworpe aan die bepalinge, voorwaardes, uitsluitings en waarborge wat daarin vervat word, word hierdie afdeling uitgebrei om verlies of skade te dek wat regstreeks veroorsaak word deur of deur middel van of as gevolg van:

1. burgerlike beroering, arbeidsonluste, oproer, staking of uitsluiting;
2. die optrede van enige wettig ingestelde owerheid in die beheer, voorkoming of onderdrukking van, of terwyl daar op enige ander wyse gehandel word met, enige gebeurtenis waarna in 1 hierbo verwys word.

Met dien verstande dat hierdie uitbreiding nie die volgende dek nie:

- (a) verlies of skade wat in die RSA en Namibië plaasvind;
- (b) gevolglike of onregstreekse verlies of skade van enige aard of beskrywing hoegenaamd;
- (c) verlies of skade wat spruit uit algehele of gedeeltelike staking van werk of die vertraging of onderbreking of staking van enige proses of werksaamheid;
- (d) verlies of skade wat veroorsaak word deur permanente of tydelike besitontneming wat spruit uit konfiskering, kommandering of rekwisisie deur enige wettig ingestelde owerheid;
- (e) verlies of skade wat verband hou met of veroorsaak word deur enige gebeurtenis waarna in Algemene uitsondering 1 (A) (ii), (iii), (iv), (v) of (vi) van hierdie polis verwys word of enige optrede van enige wettig ingestelde owerheid by die beheer, voorkoming of onderdrukking van, of terwyl daar op enige ander wyse gehandel word, met sodanige gebeurtenis.

Indien die Maatskappy uit hoofde van voorbehoudsbepaling (a), (b), (c), (d) of (e) beweer dat hierdie afdeling nie die verlies of skade dek nie, rus die las op die Versekerde om die teendeel te bewys.

Die Maatskappy se aanspreeklikheid vir verlies of skade ten opsigte van enige een Voertuig is beperk tot die kleinste van die versekerde bedrag in die bylae vermeld en die Kleinhandelwaarde van die Voertuig ten tye van die verlies of skade.

Die Versekerde sal aanspreeklik wees vir die eerste bedrag betaalbaar in die bylae vermeld ingevolge onderafdeling 1.

Tydlike herstelwerk (indien in die bylae as ingesluit vermeld)

Die Versekerde mag opdrag gee vir herstelwerk om gedoen te word sonder vooraf toestemming van die Maatskappy tot en met, maar nie vir meer nie, as die versekerde bedrag in die bylae vermeld vir enige een Voorval, met dien verstande dat 'n uitvoerige raming eers verkry en onmiddellik aan die Maatskappy gestuur word.

Insleepkoste binne die grense van die RSA (indien in die bylae as ingesluit vermeld)

Waar 'n Omskrywe Voorval binne die grense van die RSA plaasvind, sal die Maatskappy die redelike koste betaal om die Versekerde Voertuig te verwyder na die naaste Santam-goedgekeurde hersteller binne die RSA asook die redelike koste vir die beskerming, stoor en aflewering van die Versekerde Voertuig na die permanente adres van die Versekerde binne die gebiedsgrense in die bylae vermeld na die plaasvind van 'n

Omskrewe Gebeurtenis.

Met dien verstande dat:

- (a) die Maatskappy die redelike koste van sodanige insleep sal betaal ongeag of die waarde van die eis wat uit die voorval spruit, binne die eerste bedrag betaalbaar val.

Insleepkoste buite die grense van die RSA (indien in die bylae as ingesluit vermeld)

Waar 'n Omskrewe Voorval buite die grense van die RSA plaasvind, sal die Maatskappy die koste betaal om die Versekerde Voertuig te verwyder na die naaste grens van die RSA of plek van veiligheid.

Met dien verstande dat:

- (a) die Maatskappy se aanspreeklikheid beperk is tot die versekerde bedrag in die bylae vermeld vir enige enkele Voorval;
- (b) die Maatskappy die redelike koste van sodanige insleep sal betaal ongeag of die waarde van die eis wat uit die Voorval spruit, binne die eerste bedrag betaalbaar val;
- (c) indien die Versekerde Voertuig nie na die RSA gerepatrieer kan word nie op grond daarvan dat dit 'n Afskrywing is, sal die Maatskappy 15% aftrek van die skikking verskuldig aan die Versekerde;
- (d) die Maatskappy nie aanspreeklik sal wees nie om te betaal vir regeringsopgelegde aksyns, heffings of stempels met betrekking tot die repatriasie van die Voertuig.

Die Maatskappy sal ook die redelike koste betaal vir

1. die verskuiwing van die Voertuig vanaf die RSA se grens na die naaste Santam-goedgekeurde hersteller binne die RSA;
2. die beskerming, stoor en aflewering van die Versekerde Voertuig na die permanente adres van die Versekerde binne die gebiedsgrense in die bylae vermeld na herstel

na die plaasvind van 'n Omskrewe Voorval.

Sleepwa-kombinasie (indien in die bylae as ingesluit vermeld)

Ingeval van die totale verlies van 'n sleepwa wat deel uitmaak van 'n sleepwa-kombinasie, het die Versekerde die opsie om die hele sleepwa-kombinasie as 'n totale verlies te hanteer.

Met dien verstande dat:

- (a) beide die sleepwaens wat 'n kombinasie geag word, verseker is op hierdie afdeling;
- (b) hierdie uitbreiding op beide sleepwaens in die kombinasie van toepassing is;
- (c) die eerste bedrag betaalbaar onder onderafdeling 1 soos in die bylae vermeld op beide sleepwaens van toepassing sal wees;
- (d) beide sleepwaens funksioneer as 'n sleepwa-kombinasie ten tye van verlies of skade.

Wrakverwydering (indien in die bylae as ingesluit vermeld)

Die Maatskappy sal, bykomend tot die Voertuig se versekerde bedrag, die Versekerde skadeloos stel vir enige koste ten opsigte van die opruiming en verwydering van puin en wrakstukke van die Versekerde Voertuig na die plaasvind van 'n Omskrewe Gebeurtenis, met dien verstande dat die Maatskappy se aanspreeklikheid beperk is tot die versekerde bedrag in die bylae vermeld vir enige enkele Voorval.

Wrakverwydering – uitgebreide dekking (indien in die bylae as ingesluit vermeld)

Die Maatskappy sal, bykomend tot die Voertuig se versekerde bedrag, die Versekerde skadeloos stel vir:

1. enige koste ten opsigte van die opruiming en verwydering van puin en wrakstukke van die Versekerde Voertuig na die plaasvind van 'n Omskrewe Gebeurtenis;
2. enige koste ten opsigte van die opruiming en verwydering van enige vloeistowwe soos petrol, diesel of

olie wat uit die Versekerde Voertuig gelek het nadat die Voertuig beskadig is deur 'n Omskrewe Gebeurtenis.

Met dien verstande dat:

- (a) die Maatskappy se aanspreeklikheid beperk is tot die die versekerde bedrag in die bylae vermeld onder die wrakverwydering uitbreiding vir enige enkele Voorval;
- (b) die Maatskappy nie aanspreeklik is nie vir kostes wat verband hou met die opruiming en verwydering van enige vloeibare stowwe wat deur die Versekerde Voertuig vervoer is.

ONDERAFDELING 2 – AANSPREEKLIKHEID TEENOOOR DERDEPARTYE

OMSKREWE GEBEURTENISSE

Die Maatskappy sal die Versekerde skadeloos stel ten opsigte van enige ongeluk veroorsaak deur of deur middel van of in verband met enige Voertuig in die bylae beskryf of in verband met die laai en/of aflaaai van die Voertuig ten opsigte waarvan die Versekerde en/of enige passassiers regtens aanspreeklik word om te betaal vir alle bedrae, insluitende die eiser se koste en uitgawes, ten opsigte van:

- (a) dood of liggaamlike besering van enige persoon;
- (b) skade aan eiendom.

Die Maatskappy sal ook:

1. alle koste en uitgawes betaal wat met hulle skriftelike toestemming aangegaan word en is geregtig om na sy eie goeddunke te reël vir verteenwoordiging by enige doodsondersoek of ondersoek ten opsigte van enige dood wat die onderwerp van skadeloosstelling ingevolge hierdie onderafdeling mag wees of vir die verdediging in enige landdroshof van enige strafregtelike vervolging ten opsigte van enige handeling wat enige Voorval veroorsaak of daarmee verband hou, wat die onderwerp van skadeloosstelling ingevolge hierdie onderafdeling mag wees.
2. enige persoon skadeloos stel wat die Voertuig op bevel van die Versekerde of met die Versekerde se toestemming bestuur of gebruik.

Met dien verstande dat:

- (a) die persoon, asof hy die Versekerde is, die bepalings, uitsluitings en voorwaardes van hierdie versekering nakom, uitvoer en daaraan onderworpe is in soverre dit van toepassing mag wees;
 - (b) die persoon wat die Voertuig bestuur deur geen versekeraar motorversekering of die voortsetting daarvan geweier is nie;
 - (c) die persoon nie ingevolge enige ander polis op skadeloosstelling geregtig is nie, behalwe ten opsigte van enige bedrag wat nie daarkragtens verhaalbaar is nie.
3. die Versekerde skadeloos stel terwyl hy persoonlik enige Voertuig bestuur of gebruik wat binne voertuigomskrywing 1.1 of 1.3 val.

Met dien verstande dat:

- (a) die Voertuig nie aan die Versekerde behoort nie;
- (b) die Voertuig nie ingevolge 'n huurkontrak of opskortende verkoopsooreenkoms aan die Versekerde gebruikhuur of verhuur word nie;
- (c) die Versekerde 'n individu is;
- (d) 'n Voertuig op hierdie afdeling verseker is wat voldoen aan voertuigomskrywing 1.1 of 1.3;

- (e) die Maatskappy nie aanspreeklik is nie vir skade aan die Voertuig terwyl dit deur die Versekerde bestuur of gebruik word.
4. die Versekerde skadeloos stel ten opsigte van aanspreeklikheid wat ontstaan weens die sleep van enige ander Voertuig of sleepwa (insluitende aanspreeklikheid in verband met die gesleepte Voertuig of sleepwa) deur 'n Voertuig (behalwe teen vergoeding), met dien verstande dat die Maatskappy nie aanspreeklik is nie vir skade aan die gesleepte Voertuig of sleepwa of vir eiendom daarin of daarop.

Die Maatskappy se aanspreeklikheid ingevolge onderafdeling 2 is beperk tot die versekerde bedrag in die bylae vermeld vir enige enkele Voorval.

UITSLUITINGS OP ONDERAFDELING 2

Die uitsluitings – aanspreeklikheid teenoor derdeparty, in die Motor Algemeen afdeling is van toepassing bykomend tot die uitsluitings hier vermeld.

Die Maatskappy sal nie aanspreeklik wees nie vir:

1. dood of liggaamlike besering van enige persoon wat in die Versekerde Voertuig vervoer word of daarin, daarop, daarvan af of daaruit klim;
2. koste en uitgawes aangegaan vir die skoonmaak en remediërende prosedures om die gevolge van storting of lekkasie te verwyder of te herstel (ongeach of sodanige storting of lekkasie die gevolg van 'n motorongeluk is of nie) van enige stof wat in of op of deur die Versekerde Voertuig gedra word.

UITBREIDINGS OP ONDERAFDELING 2

Andersins onderhewig aan die terme, uitsluitings en voorwaardes van hierdie onderafdeling en die Algemene afdeling (waarvan alles geldig en toepaslik bly, tensy spesifiek hieronder geskrap of verander), word die dekking ingevolge hierdie afdeling verander of uitgebrei soos hieronder uiteengesit onder elke uitbreiding en klousule (maar waar van toepassing soos hieronder aangedui, slegs indien die uitbreidings en klousules as ingesluit in die bylae vermeld word).

Omgewingsbenadelingsaanspreeklikheid (indien in die bylae as ingesluit vermeld)

Nieteenstaande uitsluiting 2 van onderafdeling 2 en die uitbreiding: storting- en lekkasie- aanspreeklikheid, sal die Maatskappy die Versekerde skadeloos stel vir enige kostes en uitgawes deur die Versekerde aangegaan vir die skoonmaak en remediërende prosedures om die gevolge van storting of lekkasie van enige stowwe wat op of deur die Versekerde Voertuig gekarwei is, te verwyder of te herstel.

Met dien verstande dat:

- (a) hierdie uitbreiding beperk is tot eise waarvan die waarde groter is as die perk van die Uitbreiding: storting- en lekkasie-aanspreeklikheid;
- (b) die Versekerde aanspreeklik sal wees vir die eerste bedrag betaalbaar soos in die bylae vermeld vir iedere en elke Voorval;
- (c) die Maatskappy se aanspreeklikheid beperk is tot die versekerde bedrag in die bylae vermeld vir enige enkele Voorval;
- (d) die Maatskappy nie aanspreeklik is nie vir enige eis wat voortspruit uit enige omgewingsbesoedeling wat insluit, maar nie beperk is nie tot, enige doelbewuste of opsetlike storting van enige stof deur die Versekerde of enige party wat volgens die instruksie van die Versekerde optree, enige verlies, besering of skade wat voortspruit uit die Versekerde se doelbewuste, moedswillige of nie-nakoming van enige wette, statutêre instrumente, verordeninge, regulasies, riglyne of standaarde wat die krag van die wet het en wat van toepassing is op sodanige omgewingsinsident en/of die hantering, storting of handel, op enige wyse, met enige stof;
- (e) die Maatskappy nie aanspreeklik is vir besering, skade of omgewingsbesoedeling wat voortspruit uit die foutiewe aflewering van goedere, produkte of afval in enige verkeerde houder, by die verkeerde adres of verkeerde goedere of produkte afgelewer nie;

- (f) die Maatskappy nie aanspreeklik sal wees nie indien daar enige onderbreking is in die vervoer (insluitend, maar nie beperk nie tot rus- en vertoeflye) vir 'n periode van meer as 72 uur, van enige stof gekarwei wat moontlik kan stort of lek.

Eerste bedrag betaalbaar kwytstelling – aanspreeklikheid teenoor derde partye (indien in die bylae as ingesluit vermeld)

Die Maatskappy sal, onderhewig andersins aan die bepalings, voorwaardes, uitsluitings en waarborge vervat in hierdie onderafdeling, die eerste bedrag betaalbaar betaal soos in die bylae vermeld ten opsigte van aanspreeklikheid teenoor derde partye.

Met dien verstande dat:

- (a) hierdie voordeel eers betaalbaar word sodra die eis deur die Maatskappy geskik is, onderhewig aan die bepalings, uitsluitings en voorwaardes van die polis;
- (b) die Versekerde aanspreeklik is vir die eerste bedrag betaalbaar van toepassing op hierdie uitbreiding soos in die bylae vermeld vir iedere en elke Voorval waar die bedrag van die eis minder is as hierdie eerste bedrag betaalbaar;
- (c) die eerste bedrag betaalbaar soos in die bylae vermeld, vir iedere en elke Voorval kwytgestel sal word waar die bedrag van die eis meer is as die eerste bedrag betaalbaar.

Passasiersaanspreeklikheid (indien in die bylae as ingesluit vermeld)

Uitsluiting 1 van onderafdeling 2 word hiermee gekanselleer.

Met dien verstande dat:

- (a) die Maatskappy se aanspreeklikheid beperk is tot die die versekerde bedrag in die bylae vermeld vir enige enkele Voorval;
- (b) die persoon vervoer is in of op, of inklim in, uitklim uit of vanaf 'n permanent geslote passasierskajuit van die Versekerde Voertuig;
- (c) die Maatskappy nie aanspreeklik is onder hierdie uitbreiding nie indien die gebiedsbeperking in die bylae ingevolge hierdie uitbreiding aandui "Binne RSA" en die Omskrewe Voorval plaasvind buite die grense van die RSA.

Passasiersaanspreeklikheid insluitend oop Voertuie (indien in die bylae as ingesluit vermeld)

Voorbehoudsbepaling (b) van die uitbreiding: Passasiersaanspreeklikheid word hiermee gekanselleer.

Storting- en lekkasie-aanspreeklikheid

Nieteenstaande uitsluiting 2 van onderafdeling 2 word die Maatskappy se aanspreeklikheid uitgebrei om kostes en uitgawes in te sluit wat deur die Versekerde aangegaan is vir die skoonmaak en remediërende prosedures van die gevolge van storting en lekkasie van enige stof gekarwei op of deur die Versekerde Voertuig en terwyl dit onder die toesig en beheer van die Versekerde is.

Met dien verstande dat:

- (a) die Maatskappy se aanspreeklikheid nie R250,000 oorskry vir enige enkele Voorval nie;
- (b) die Versekerde aanspreeklik sal wees vir 'n eerste bedrag betaalbaar van R25,000 vir iedere en elke Voorval.

Ongemagtigde passasiersaanspreeklikheid (indien in die bylae as ingesluit vermeld)

Die skadeloosstelling onder onderafdeling 2 word, nieteenstaande uitsluiting 1, uitgebrei om die Versekerde se regs-aanspreeklikheid te dek vir die dood of liggaamlike besering van persone wat vervoer word in of op, of inklim in, uitklim uit of vanaf, enige Versekerde Voertuig strydig met die Versekerde se opdrag aan hulle bestuurder om nie passasiers te vervoer nie.

Met dien verstande dat:

- (a) die Maatskappy se aanspreeklikheid vir enige enkele Voorval nie die versekerde bedrag sal oorskry wat in die bylae vermeld word nie.

ONDERAFDELING 3 – INSITTENDES VAN DIE VERSEKERDE VOERTUIG

Dekking ingevolge hierdie onderafdeling is slegs van toepassing indien in die bylae as ingesluit vermeld.

Mediese uitgawes (indien in die bylae as ingesluit vermeld)

Indien enige insittende van die Versekerde Voertuig regstreeks in verband met die Voertuig, 'n liggaamlike besering opdoen op gewelddadige, toevallige, uitwendige en sigbare wyse, sal die Maatskappy die mediese uitgawes aangegaan as gevolg van die besering aan die Versekerde betaal, insluitende enige koste aangegaan om die beseerde insittende te bevry van die Voertuig of om die beseerde insittende te vervoer na 'n plek waar mediese behandeling gegee kan word.

Met dien verstande dat:

- (a) die Maatskappy se aanspreeklikheid per persoon nie die versekerde bedrag in die bylae vermeld sal oorskry nie;
- (b) die Maatskappy se aanspreeklikheid per Voorval nie die versekerde bedrag in die bylae vermeld sal oorskry nie;
- (c) die dekking beperk is tot die insittendes van 'n privaattipe motorvoertuig of die permanent geslote passasierskajuit van enige ander Voertuig;
- (d) die bedrag betaalbaar ingevolge hierdie dekking verminder word met enige bedrag wat ingevolge enige werkersongevalle- of soortgelyke wetgewing verhaalbaar is.

UITBREIDINGS VAN TOEPASSING OP ALLE ONDERAFDELINGS

Andersins onderhewig aan die terme, uitsluitings en voorwaardes van hierdie onderafdeling en die Algemene afdeling (waarvan alles geldig en toepaslik bly, tensy spesifiek hieronder geskrap of verander), word die dekking ingevolge hierdie afdeling verander of uitgebrei soos hieronder uiteengesit onder elke uitbreiding en klousule (maar waar van toepassing soos hieronder aangedui, slegs indien die uitbreidings en klousules as ingesluit in die bylae vermeld word).

Vervoer van betalende passasiers (indien in die bylae as ingesluit vermeld)

Spesifieke uitsluiting 4(ii) in die Motor Algemene afdeling word hiermee gekanselleer.

Gebiede – uitgebreide dekking (indien in die bylae as ingesluit vermeld)

Die standaard gebiedsgrense vermeld in die bylae van die Motor Algemene afdeling word hiermee uitgebrei om die lande in te sluit wat as ingesluit onder hierdie uitbreiding in die bylae vermeld word.

Verhuring van voertuie (indien in die bylae as ingesluit vermeld)

Spesifieke uitsluiting 4(i) in die Motor Algemene afdeling word hiermee gekanselleer.

Met dien verstande dat:

- (a) die Maatskappy nie aanspreeklik is nie om te betaal vir die verlies van die Versekerde Voertuig indien die Voertuig verhuur is aan 'n derdeparty in terme van 'n verhuringsooreenkoms, welke die verhuringsooreenkoms op skrif is aldan nie, en die derdeparty bly in gebreke om die Versekerde Voertuig aan die Versekerde terug te besorg in terme van die bepalinge van die verhuringsooreenkoms.

SPESIFIEKE UITSLUITINGS

Die spesifieke uitsluitings van die Motor Algemeen afdeling asook die spesifieke uitsluitings hieronder vermeld is van toepassing:

Die Maatskappy is nie aanspreeklik onder hierdie afdeling nie:

1. met betrekking tot enige ongeluk, besering, verlies, skade, aanspreeklikheid, koste en/of uitgawes veroorsaak, opgedoen of aangegaan in enige land buite die standaard gebiedsperke soos vermeld in die Motor Algemene afdeling en die dekking vermeld in die bylae ten opsigte van Gebiedsperke – uitgebreide dekking. Die Maatskappy sal egter die Versekerde skadeloos stel in terme van onderafdeling 1 van hierdie afdeling teen verlies van of skade aan enige Versekerde Voertuig onderwyl dit per see of land tussen hawens of plekke in die omskrewe gebiede vervoer word, insluitende oplaai en aflaai wat met sodanige transito verband hou;
2. indien die Versekerde Voertuig gebruik word deur die Versekerde vir enige ander doel as vir die besigheidsdoeleindes van die Versekerde of vir sosiale, huishoudelike en plesierdoeleindes;
3. indien die Versekerde Voertuig gebruik word deur enige iemand anders as die Versekerde, met die algemene medewete en toestemming van die Versekerde, vir enige ander doel as vir die besigheidsdoeleindes van die Versekerde of vir sosiale, huishoudelike en plesierdoeleindes;
4. indien die Versekerde Voertuig in die besit, bewaring of beheer van 'n lid van die motorhandel is om namens die Versekerde verkoop te word.

VERPLIGTE VOORWAARDES

Die verpligte voorwaardes in die Motor Algemene afdeling sowel die wat hieronder aangegee word, is altyd van toepassing.

Outomatiese byvoegings

Die Maatskappy sal aanspreeklik wees vir enige bykomende Voertuig wat gekoop, gebruikhuur of gehuur word wat nie in die bylae verskyn nie vir tot en met die minste van:

1. R500,000, of
2. die Voertuig se versekerde bedrag, of
3. die aankoopprys van die Voertuig.

Met dien verstande dat die Versekerde:

- (a) die Maatskappy in kennis stel binne 14 dae na die datum van aankoop, bruikhuur of huur;
- (b) enige bykomende premie betaal soos versoek deur die Maatskappy.

Eisvrye groepe

Die eisvrye groep (EVG) vir elke Versekerde Voertuig word in die bylae aangedui en is gebaseer op die aantal eise vir 'n spesifieke Voertuig gedurende vorige versekeringstydperke gemeet van die een hersiening tot die volgende. Die EVG is van toepassing op Voertuie omskryf in voertuigomskrywing 1.1. By die mees onlangse hernuwings-/verjaardagdatum word die premie gebaseer op die aangepaste EVG soos volg:

1. Die hersieningsdatum verwys na 'n datum negentig (90) dae voor die hernuwings-/verjaardagdatum;
2. 'n Vorige versekeringstydperk verwys na 'n ononderbroke tydperk van 12 kalendermaande voor die hersieningsdatum;
3. Eisvrye groepe wissel tussen 0 en 7 waar 0 die hoogste premie het en 7 die laagste premie;
4. Vir elke eis tydens 'n vorige versekeringstydperk, sal die Maatskappy die EVG verminder met 2 punte by die volgende hernuwings-/verjaardagdatum en dienooreenkomstig die premie verhoog;

5. Vir elke vorige eisvrye versekeringstydperk, sal die EVG opwaarts aangepas word met een punt by die volgende hernuwings-/verjaardagdatum en die premie dienoreenkomstig verminder word totdat dit die maksimum van 7 bereik;
6. Byvoorbeeld, as 'n privaattipe Voertuig 'n EVG van 4 het en die Versekerde het nog 'n eisvrye tydperk, sal die EVG na 5 gewysig word by die volgende hernuwings-/verjaardagdatum. As daar 'n eis is, sal dit aangepas word van 4 na 2 by die volgende hernuwings-/verjaardagdatum.

Beskrywing van gebruik

Dekking van die Voertuig soos beskryf in die bylae is voorwaardelik waar die tipe voertuig:

1. Privaattipe motorvoertuie vir privaatgebruik is en die Voertuig word met die algemene toestemming en medewete van die Versekerde gebruik vir doeleindes buiten sosiale, huishoudelike en plesierdoeleindes, of
2. Bus – godsdienstige, opvoedkundige instansies, ouetehuse is en die Voertuig word met die algemene toestemming en medewete van die Versekerde gebruik vir ander doeleindes as vervoer vir godsdienstige of opvoedkundige instansies of ouetehuse.

VOORWAARDES

Voorwaardes is slegs van toepassing indien dit in die bylae as “van toepassing” vermeld word.

Beperking op klank- en/of visuele toerusting (indien in die bylae as van toepassing vermeld)

Die Maatskappy sal die Versekerde skadeloos ten opsigte van verlies of skade aan enige klank-, oudiovisuele, telefoon- en navigasietoerusting waarmee die Versekerde Voertuig permanent toegerus is deur iemand anders as die voertuigvervaardiger.

Met dien verstande dat:

- (a) die Maatskappy se aanspreeklikheid beperk is tot die versekerde bedrag in die bylae vermeld vir enige enkele Voorval;
- (b) die Versekerde aanspreeklik sal wees vir die eerste bedrag betaalbaar soos in die bylae vermeld vir iedere en elke Voorval.

Die Maatskappy sal ook die Versekerde skadeloos stel ten opsigte van enige sodanige toerusting wat uit die Voertuig verwyder is.

Met dien verstande dat:

- (a) die toerusting ontwerp is om verwyder of gedeeltelik verwyder te word;
- (b) die toerusting nie kan funksioneer sonder die Voertuig nie.

OPSIONELE UITSLUITINGS EN BEPERKINGS

Hierdie is uitsluitings of beperkings van die dekking wat die afdeling bied wat slegs geld indien as sodanig aangedui in die bylae.

Uitsluiting van motorglas dekking (indien in die bylae as van toepassing vermeld)

Die Omskrewe Gebeurtenisse onder onderafdeling 1 word gewysig om skade aan enige windskeerm, kant- of agterruit uit te sluit wat deel uitmaak van die Versekerde Voertuig.

Uitsluiting van bedrog (indien in die bylae as van toepassing vermeld)

Die Maatskappy sal nie aanspreeklik wees nie vir verlies van of skade aan enige Versekerde Voertuig wat ontstaan uit of wat verband hou met enige ruil-, kontant- of kredietverkooptransaksie, ingesluit diefstal deur middel van valse voorwendsels en/of bedrog.

OPSIONELE BEPERKINGS IN DEKKING

Beperkings in dekking word weerspieël in die tipe van dekking in die bylae wat geselekteer is per Versekerde Voertuig.

Derdeparty dekking

Onderafdelings 1 en 3 is gekanselleer.

Derdeparty-, brand- en diefstaldekking

Die aanspreeklikheid van die Maatskappy ingevolge onderafdeling 1 word uitsluitlik beperk tot verlies of skade as gevolg van brand, selfontbranding, weerlig of ontploffing of weens diefstal of enige poging daartoe. Verder word onderafdeling 3 gekanselleer.

Derdeparty- en branddekking

Die aanspreeklikheid van die Maatskappy ingevolge onderafdeling 1 word uitsluitlik beperk tot verlies of skade as gevolg van brand, selfontbranding, weerlig of ontploffing. Verder word onderafdeling 3 gekanselleer.

Omvattende dekking uitgesluit diefstal-/kapingdekking

Die aanspreeklikheid van die Maatskappy ingevolge onderafdeling 1 word beperk deur die uitsluiting van aanspreeklikheid vir verlies van of skade aan die Versekerde Voertuig of sy toebehore en onderdele as gevolg van diefstal of kaping of enige poging daartoe.

Vir interne makelaarsgebruik alleenlik - van tyd tot tyd onderhevig aan klein veranderinge